

興安縣志卷十一

人物志

名臣

漢董相之三策唐魏徵之十思宋趙普之半部所謂文學足以經務才畧足以佐時者也外此雖大臣不與何論具臣能臣不與何論庸臣興之稱臣者夥矣勳業立則名在當時奏疏傳則名在後世蓋寥寥焉然亦不謂其遂無也

志名臣

唐

興安縣志

卷十一 名臣

一

鄭 畋字文台宣宗戊辰進士拜鳳翔節度使黃巢逼長安上走興元畋謁道次請車駕留鳳翔黃巢僭號畋嚙指血書表遣使詣行在召將佐約鄰道合兵討賊天下得畋檄爭發兵應之賊懼不敢復窺西京尋以畋爲司空同平章事朝廷賴之文德二年致仕乾甯二年遷南源是爲南源鄭氏始祖云

前志

宋

陳康伯字長卿弋陽人宣和三年中上舍丙科累遷太學正丁內艱貴溪盜將及鄉康伯起義丁逆擊俘其渠魁邑得全建

炎末通判衢州攝郡事盜發白馬源康伯督州兵濟王事進討克之高宗駐蹕建康除樞密院大計議官累遷司勳郎中康伯與秦檜太學有舊檜當國康伯在郎省五年泊然無求始遷運器監金使至詔康伯館伴以事論罷知泉州垂十年起知漢州召對除吏部侍郎首請節用寬民凡州縣取民無藝許監司互察臺諫彈劾尋兼禮戶刑三部前此有司希檜意興大獄康伯平讞直冤士大夫存沒多賴之除吏部尙書尋拜參知政事以通奉大夫守尙書右僕射同中書門下平章事明年三月拜尙書左僕射五月金遣使賀天中節出媵

興安縣志

卷十一 名臣

二

言求淮漢地措取將相大臣且以淵聖凶問至康伯主禮部侍郎黃中之論持斬衰三年先是葉義問賀允中使還言金必敗盟康伯請早爲之備金入廬州中外震駭朝臣有遣家豫避者康伯獨具舟迎家人來浙人恃以安敵迫江上有勸上幸越趨閩者康伯奏曰審爾則大事去矣於是降手詔親征會金帳下變作一夕遁去孝宗卽位兼樞密使尋乞休致加少保封信國公北兵再入淮甸人情驚駭咸望康伯復相上出手札卽家居召之拜尙書左僕射進封魯國公康伯力疾就道兼程以進至闕下詔子安節壻文好謙掖以見減拜

賜坐間日一會朝許肩輿至殿門非大事不署敵師退尋以
目疾免朝謁丐歸章屢上不許一日出殿門喘劇輿至第卒
年六十九贈太師諡文恭慶元初配享孝宗廟庭改諡文正

宋史

按陳康伯史載弋陽人劉光鄭雅蔣澗鄭毅通志皆載上
饒人然所居之地實割隸興安族姓墳墓在焉於例得書

下倣此

雷志

興安縣志

卷十一 名臣

三

興安縣志十一

人物志

宦業

上爲國下爲民本之於學問濟之以才幹而宦業出焉古之白鹿夾車黃龍望府麥秀兩歧民歌五袴誠足多矣興邑若洪經之知臨高蔣澐之知福州鄭毅之撫四川其政蹟豈無卓卓可傳者乎志宦業

明

姜啓隆字仁厚號南山性剛方明永樂甲午舉於鄉乙未成進

興安縣志

卷十一 宦業

四

士任行人司司正十八年丁父憂起服改除都察院陝西道監察御史宣德三年陞直隸知府六年五月丁母憂起服任湖廣寶慶知府正統元年考察原職致仕凡宦遊二十五年清正自勵執法不阿風裁特著洪熙元年詔有曰發聲賢科薦更任使典司憲紀克効勤勞其璽書子孫猶世守之志申

姜 忠字君誠號西溪昆季五人以孝友稱永樂丁酉舉於鄉初任北京永平府撫甯縣知縣後陞福建延平府同知爲政尙寬厚所至民懷其德惜年不永未展其所施焉志申

鄭 雅字仲平以歲貢生調和鄉主簿之官以一僕自隨每與

令長部使者爭不便面頸時時發赤繼判安節奏蠲逋稅病革戒僕飭後具無受賻歸裝一弊篋朝祭服外家訓十四條而已孫毅舉進士後有傳志通

按鄭氏宗譜所作家訓有二十四條

李 鏡字文明登成化己丑進士授刑部主事爲林莊敏公所器重黎文僖公知其賢薦知岳州府鋤梗植弱崇學博惠築辰陵磯洩水墾田授民以居民深德之名白李公堤陞陝西參政民不忍舍去立生祠祀之未幾陞河南按察司轉浙江布政使卒西淮李公銘其墓曰器度偉重厚倫誼達事體才

興安縣志

卷十一 宦業

五

而不伐貴而能約守身奉法三十年猶一日云志申

蔣 澐字子川由進士歷官兵曹出知福州府境內大治郡有靈濟宮例遣中官歲時易衣靡費供億以萬計澐奏請以有

司行禮罷遣中官志通

陳 紳字廷璋任臨安教諭正身率士轉黔江知縣單騎出入而黔大治撫按交章薦之日才學見稱於士人忠信可行於蠻貊亦可想見其風格矣志前

鄭 毅字立之宏治進士累官至四川巡撫擢兩淮總漕所在政聲赫奕爲當時名宦著作甚富燬於火僅存巖山詩集志通

李 艾字子芳號靈巖嘗師事婁諒諒雅器之有讀殘蕭寺三更月踏破青山萬里雲之句宏治乙丑成進士選庶吉士授浙江道御史會土官岑某以罪逮獄厚賂諸權貴貫免艾廉得其情竟寘於法逆瑾怙勢率同列伏闕叩諫獲罪繼按獄粵中洗冤牘無算丁內艱歸結社於城西周公墩與士大夫賦詩其間申志

汪 雲字尙禮號遼川原任廣東河源縣藍口渡巡檢司能盡其職延師教子皆以古名臣之事勉之其後子淵成進士官至大理寺右丞雲以子貴封贈如其官申志

興安縣志

卷十一 宦業

六

張 炎字玉輝生時父夢一人執笏立其側翼日炎生岐嶷不凡甫六歲誦詩數過輒記憶久不忘隨父任嘉禾見逋稅者爲乞寬父奇之旣長古學靡不究習從總戎征交趾軍中有掠子女獻者受而遣之凱旋御史季慶薦可用遂擢工部營繕主事陞屯田郎中屢奉命四方還奏稱旨冰蘖之操內外稱之南山有巨蟒爲文驅之遁去人以爲忠誠所感其後以薦超遷廣東參政威惠著稱擢兩廣都御史以疾卒居官時人號爲板張以其不肯隨俗云前志

汪 淵字景顏號荆山正德庚午鄉薦辛未進士官直隸大名

山東沂水知縣歷廣西道監察御史巡按直隸河南廣西陞
大理寺右丞以直忤當道棄官歸里然器識宏深性姿端厚
愛民存愷悌之心處已勵操持之志朝野交推申志

洪 經嘉靖間知臨高縣廉明果斷多所興革民利賴之入覲
辭不復任臨民戀慕赴府呈請留任相率數百人卒爲上官
所忌決意歸田去時民皆泣涕送之申志

王嘉猷號四侗家貧苦讀年逾三十薦於鄉初任吉州五雲學
博三上公車不售任滿擢雷州海康知縣調武昌大冶知縣
官聲藉甚後以親老解組閱月母卒作失養天恨等篇相國

興安縣志

卷十一 宦業

七

賀逢聖序之服闋終身不復出申志

周以敬字欽夫二十四都人品端學粹嘉靖壬戌進士歷官至
御史守正不阿素有直聲爲上游所引重而士民亦敬畏之

申志

姜荃林十五都人學問淹博才能肆應崇禎丁丑進士知房山
縣事恤士愛民著有直聲是能以實心行實政大異於俗吏

云申志

國朝

李仲穎字儒貞卽艾之孫由恩貢歷官漢中知府先是穎任襄

陽府丞官兵進勦山寇顛隨營給餉會師失利被執曉以大義賊皆感愧釋之進福州知府惠廉兼著士民有三山頌言

志申

姜元春字伯昌康熙丙午科舉人初任湖廣歸州興山知縣時兵燹未靖哀鴻遍野安定還集計無不周農時則停徵民饑則請賑土滿則給荒田與近便之家報最之日父老欲挽留之不得總制董衛國餞於黃鶴樓見沿江上下垂淚者數千人董撫而問之民曰寇盜擄掠姜公禦之年歲薦荒姜公養之向非姜公之仁政則室家難聚父子兄弟不親教之至育

興安縣志

卷十一 宦業

八

之深是以不忍違也董聞之亦爲淚下謂元春曰今日之大吏功不及乎一人如子之德被羣黎名昭天下使當世俗吏聞之亦足愧矣及爲工部屯田主政遇事敢爲先是工部凡有興作發庫帑者少派本衙執事者多自元春出差琉璃廠必不肯以工料之銀扣貼別項工人之困得甦後

陵工巖峻諸臣無所措手元春抗疏請發自後四司之興作皆先估料沿例奏請官與吏世受其德故建祠工部署左朔望

祀之志申

童登殿字對揚以歲貢任南安訓導家居以善誘聞負笈相從

者多知名士涖南安戶外屨滿自賦詩論文外無雜賓也

前志

周 溶字克安號控夫新城訓導甫到任卽以造就人才爲事
遇歲大比集邑中能文者課於堂定其殿最一時獲售者多
其後夫妻俱年九十而終

申志

周 溥字日天號葛川歲貢任萬載訓導布衣疏食不殊寒素
教諸生以實行爲先和易近人久且與之俱化歸年八十餘

族鄰聚談終日靡倦

申志

王 駿字聖從恩貢生城東隅人學有淵源從遊甚衆子弟多
所成就後爲上高教諭教士之勤亦如之病卒於任

申志

興安縣志

卷十一 宦業

九

方士宏字克任瀘溪訓導爲諸生時合邑推重贊修縣志及居
官以身爲教不逞才華涵育薰陶人自得其益於訓詞之外

申志

方如琮字素重袁州訓導持身嚴謹教士有法來謁者不受贊
且捐俸助膏火擇其貧苦者重給之病終扶櫬歸送者泣下
以百計

前志

姜兆基字立績號輔齋七歲失怙家極貧喜讀書母以紡績資
之後由明經授都昌司訓冷署蕭然與諸生口講指畫無虛
日士心翕然五載卒於任所

申志

項純禮字立重拔貢生任奉天廣甯知縣潔清自愛威惠並著
公餘觀書手不釋卷政稱廉平不假鞭朴而民服前志

周 堂字汝登號印渠歲貢生授新昌訓導性孝友敦善行有
親姪以田租二百石求售重其價買之後姪貧益甚又命子
鎬悉還其田并不索價居官能以古道訓士肅然起人敬越
後孫象鵬復任是邑教諭士心尤欣服之申志

張光國字廷勳以歲貢授袁州訓導清操刻苦惟以扶植士氣
爲汲汲講學論文泊如也年七十以老致仕孺慕終身鄉里
有困乏者推所餘以給之年八十卒前志

興安縣志

卷十一 宦業

十

黃大勳字名臣幼貧甚年十六攻舉子業端方純樸不事華靡
五十貢成均任峽江訓導師道自重士風丕振遇

恩賚封父母卽告休享上壽申志

方之海字百川號淡人幼以穎異稱家極貧讀書不輟年十八
受知學憲林五十貢成均授永豐訓導嚴督課程砥勵諸生
仕四載卽告歸卒之日年九十有三長孫以瑚司訓彭澤講
學課士有祖風惜不永年以疾終

周 銑字重南號揀夫受業蔣藏園太史之門已而遊學豫章
名益著以歲貢任南安教授其居家也以德化於鄉其居官

也以康貞其守不受請託諸生有遭不白之冤者必力爲雪之若王新鼇劉登敏之事至今傳播人口南城吳白庵時官大庾動以白眼加人獨敬禮銑嘗贈有詩四首載藝文

周 鴻字大猷號景山由歲貢任臨江訓導學識宏通尤勤於課士以造就人才爲己任諸生有穎異者輒召至談經論事必鬯乃已多士愛而化之任二載尋致仕歸足跡不履公庭

課子若孫不墜家聲

以上申志

毛克豐字健翔號舫齋乾隆丁酉拔貢戊戌

朝考充四庫館謄錄受 莊親王聘居西席暇時赴館辦公議

興安縣志

卷十一 宦業

十一

敘得州同分發廣西署梧州府經歷是年兩廣孫制軍進勦安南豐以書生從戎馬未邀議敘歷署永甯龍英鬱林三州乙卯戊午廣西鄉試闈事畢借補柳州府經歷庚申調向武州州判所至均以廉謹稱甲子入都候選三年時近六旬呈請改教戊辰抵建昌學任二十餘年士心敬服戴文端回籍道過南康豐進謁文端公握手談心語豐曰如公器識文藝有爲有守今屈坐寒氊所謂以教得民以道得民者也卒於建昌學署年七十有九諸孤扶櫬歸無一錢尺布遺子孫咸豐庚申學博歐陽公楷讚其像

興安縣志卷十一

人物志

理學

帝王之道得孔子而傳聖賢之道得宋儒而明所以傳且明者在講學講學尤在窮理也佛老之流非不講學以窮理然毫釐千里求其講孔孟之學窮性命之理者往往罕其人興安密邇鵞湖朱子聚徒處也其門人稱所學堅苦者黃勉齋先生爲最至若謝疊山枋得吳草廬澄二先生皆講學于興茲不及贅請以興之人著于篇志理學

興安縣志

卷十一 理學

十二

宋

劉養浩字體元世居上饒安輯鄉葛源聞黃勉齋講學于閩徒步往師之聞居敬窮理之要歸而踐履益篤事父東白先生以孝閨壺肅然上下雍睦舉太學進士授甯國府教授以禮律諸弟子奔父喪回服闋不復起益肆力于學從者愈眾有以讀書爲問者曰經傳發明吾心之理純粹精確愈讀愈有味諸子須能擇斯爲善讀有以爲學之要問者曰天人原無二理聖賢總是一心宇宙間凡所當爲者皆吾人分內事而致知力行老先生之教具在盍其體之所謂老先生者溯黃

勉齋而上述朱晦菴之謂也後以疾卒於家崇祀鄉賢明呂
柟爲之傳

興安縣志

卷十一 理學

十三

興安縣志卷十一

人物志

儒林

揚子法言云通天地人曰儒夫豈徒儒冠儒服哉在漢獨董仲舒稱醇儒而趙宋周程朱張諸儒學倡百代遙遙千百年弗可及也已士苟能言先王之法言行先王之德行窮則獨善達則兼善縱不如漢儒朱儒亦一時名儒也志儒林

元

興安縣志

卷十一 儒林

十四

劉光字自謙延祐進士授翰林編修少承家學一時名士爭與之游稱之曰泉山先生祖養浩受學黃勉齋得居敬窮理之要號白石先生光因創白石書院祀朱文公而配以勉齋又建義塾置義田以贍鄉子弟之來學者朝廷嘉其行誼旌表其門志通

按劉養浩通志府志俱作養拙而劉氏宗譜俱作養浩因附於此

明

張深字士淵爲人操行端謹涉獵經史善吟咏渾厚有唐人

風尤善書法兼通四體好寫梅竹居家嚴禮法斥絕緇羽之流雨膺薦辟皆不就自築精舍於荷峰之下以訓其子弟凡郡邑有纂修之事必諮焉

申志

方璐字惟重品端學博邑士之賢達者多出其門授將樂教諭門人御史周以敬贈以詩曰絳帳橫經憶昔年春風桃李自爭妍祇緣牴牾齊門瑟莫訝荒涼鄭客羶時人誦之

前志

國朝

楊景字星瑞號恬齋二十都人廩膳生潛心經術輯有尙書四書講義鄉試屢薦不售嘗在西園設教游其門者多文行

興安縣志

卷十一 儒林

十五

兼優之士孝行永譽之子也所輯書未梓至今寶之

據孔志增

童秉廉字淑恢號敬軒歲貢生故貧士也二十四都人徙居城東隅品學冠一邑髮白齒落猶手不釋卷所鈔書不下兩牛腰讀書之暇灌園自給環堵蕭然簞瓢屢空守身似處子足跡不出戶庭縣令知其賢不以公事擾惟申侯到任每歲必給石米斗酒以養其老歿之日學博鄒夢蓮銘其墓輯有詩經易經註疏未梓曾孫仁壽珍藏之

徐廷棠字召拔號南谷膺歲薦家頗裕饒不事生產喜讀書至老猶覺青燈有味品行高潔一切齷齪子不與交游晚年好

讀堪輿書聞有奇山水雖足繭不顧也子五三列膠庠壽八
十有五洵爲一邑典型

興安縣志

卷十一 儒林

十六

興安縣志卷十一

人物志

文苑

勳業爛如聲施無窮此大丈夫得志於時之所爲也若左
之盲遷之腐虞卿之窮愁始發憤而著書立說倍難爲情
矣然落墨紙上談何容易惟欲明其道而因託諸文則童
稚歌謠游女吟咏亦有足採况士人乎志文苑

明

歐陽札字仲文歲貢性恬淡文名藉甚子美中天啓間選貢廷

興安縣志

卷十一 文苑

十七

試謁相國鄭以偉贈以詩曰歐陽青錢才百選品愈軼貢茶
使偕來氣味都第一可謂有鳳毛矣前志

國朝

鄭大雅字秀子順治庚子舉於鄉三上公車不遇乃益發憤讀
書肆力詩歌古文辭詩集八卷止存其二代古詩一卷吉水
尙書李振裕爲之序國初劉侯修縣志雅參互考訂其功居
多申志

李炳字大文號彭山以歲貢官贛州廣文學富才贍工於詩
律抵任與同寅湯大坊日相倡和大坊贈詩有云斗酒百篇

供奉句牙籤萬軸鄴侯編蓋實錄也接見諸生必獎勵鼓舞之告歸時多士猶惓惓不忘云申志

鄭人瑞孝廉大雅子也生平以詩爲性命足跡所至皆有題咏遠近名下士與之遊咸稱道之所著有蟋蟀吟燕遊草梅花四十絕楚遊一箋等集藏於家有李振裕張光豸序申志

李一培字必伯號景亭雍正丙午舉人穎敏篤學於書無所不窺其爲文健筆冥搜思深徑曲戴篋圍侍御先任邑司諭見其遺文嘗謂不在周力堂下晚年寄意詩酒公車一上遂不復赴乾隆庚午截取知縣亦不就其高曠如此申志

興安縣志

卷十一 文苑

十八

王 波字紋若從父裕駿任上高教諭卒於官寒署蕭條至不能奔喪波千里扶櫬以歸叔母缺養迎奉於家猶親母所居城市杜門不出家藏萬卷朝夕課誦士之遊其門者擔簷負笈相踵而至生平嚴道義辨取與風骨稜稜談論之下放浪形骸笑語甚狎稍有拂意卽達官貴介未嘗少挫守令並重之前志

徐可久字微權歲貢生授南城訓導以年老不就任生平喜讀書鄉族子弟俊秀者必多方造就遇寒士舌耕無地者務設法措其館穀或自行飲食之不使乏其鄉黨或有雀角事權

力爲排解之年逾八十而終人咸以爲失却王彥方云

前志

李煒字廷光號仙根質魯志學年三十餘爲諸生數奇屢困場屋乾隆三十四年己丑應試年九十八矣次年庚寅恭遇

萬壽恩科教諭李殿邦以煒名聞諸兩院并贈資斧試畢海大

中丞特奏

欽賜舉人李殿邦更贈以裘帛俾公車北上次年已百歲矣藩

司李爲請

旌建坊有云歷三十六回閏月歌咏太平作六十七載諸生遭

逢特達試畢

興安縣志

卷十一 文苑

十九

召見命內侍扶掖之無令跪拜

賜國子監司業抵任復

寵以詩詩云人瑞期頤儘有云春闈應試未曾聞三場竟得全

文字一命應教獎毖勤雅化育才欣壽世宏恩錫類祝

慈雲端知欲笑胡安定年詡曾昌最出羣

上賜御用表裏至今士林稱爲盛事

前志

鄭若錦字維舟號步巖戊子舉人磊落自喜文思甚敏仲紙萬言若有神助主白石講席十餘載從遊益衆年六十終於家

申志

鄭 樞字象北號斗垣歲貢生七歲就傅穎悟絕倫弱冠遊庠
工舉子業乾隆庚午鄉闈呈薦不售家居課徒從遊甚眾教
人以經史爲根柢經其指畫多所成就邑人士咸稱爲經師
云申志

楊光朝郡增生字公佐號南圃性至孝穎敏好學弱冠補弟子
員七赴棘闈不遇耄而嗜學益篤諄諄以詩書孝弟教其家
及其鄉里邑侯學博交重其德舉鄉飲介賓年八十四卒申志

毛克舉字遠翔號个園年二十補弟子員爲學寒暑不輟生平
博極羣書詩古文辭著作甚富志載有岑港堤路序一篇梅

興安縣志

卷十一 文苑

二十

雪寺大水紀事七古一首申志

周 瑛字漢玉號亘雲邑諸生好讀古人書凡廿一史及涑水
通鑑紫陽綱目靡不貫串詩文則獨愛李杜韓曾四家少作
梅花七律劇爲名流所賞古近體詩皆可傳著有鳳鳴軒草
又輯歷朝詩粹並藏於家申志

楊仕紳字縉階號笏亭邑廩生家極貧讀書刻若足不履戶外
專以授徒爲事隨材多所成就有貧而慕學者不計束脯其
品高行潔實士林中所罕覯也年六十二卒申志

歐陽文炳字象先歲貢生歐陽樂字仲宣以歲貢薦授無錫主

簿陞廬州衛經歷辭不赴居家有長者風皆以純謹聞甲志

歲貢生張榜方來泰方爲弼項大紳徐湘均有文名而行尤篤

謹士子多師事之申志

廩生徐鼎吉方東白徐日輝項天貞歐陽維城項元映邑庠姜

震童士章歐陽柱李德純皆廉隅自飭以好學聞申志

李應清字巨文性穎異弱冠遊庠棘闈屢薦不售文名甚著邑

人士多出其門申志

恩貢藍第雲三都人故貧士賦性樸誠制行芳潔喜讀書至老
不倦屢試高等舌耕四十餘年子弟多所成就居恒孝友人

興安縣志

卷十一 文苑

二十一

無間言熊學博以順親敬長勉循孝弟安貧守分從無曠課
舉優

張本懋字靜修六都人歲貢生世居上窰口家雖近城至問城
中事如以米價問王掾概弗知也博覽羣書作文無浮辭浪
墨性好客五味必自調飲必盡醉有投轄風晚年一貧如洗
而伎求之心終未嘗萌也

張躍鯤字潛修一字泉漱號海門靜修弟也幼甚聰穎于書無
所不讀作文有南華秋水筆意汪瑟菴文宗評其康子曰題
文云一莖草化丈六金身一生筆墨數字括之矣性嗜酒醉

則執鐵綽板唱大江東去響振林木其豪爽蓋如此明經不第惜哉

徐廷楷字孔培號魯齋十八都人道光甲甲膺歲薦家貧好學雖飢腹雷鳴直以讀書聲相應和終身以館爲家不干外事人多易而侮之亦弗之較也

胡思成二十七都人鄉試屢薦不售以明經終生平讀書刻苦揣摩花樣玉潤珠圓無寒酸氣若上邑黃孝廉元培本邑周孝廉麟書皆游其門者也不獨有文而且有品以如此才而竟如羅昭諫金榜無名倘所謂劉蕡下第我輩登科甯無愧

興安縣志

卷十一 文苑

二十二

死者非耶

吳進侶字拔羣號霖林十五都人秉性恬淡與物無爭家貧好學老不倦勤歲科試輒高等沈學憲曾梓其文教學四方多所成就以明經終子升三字雲階邑增生讀書日能數行作文殊有鳳毛課徒詳訓詁辨聲韻一洗從前村學時師之陋生平屏絕外事以書爲命可謂賢喬梓矣

胡邦榮字繼穆三十一都人邑廩生郡邑聞其賢飭兩學舉報優行郡守屢召見常歎曰今得胡孺子愧予無榻以待之此

誠多士領袖也

據孔志節錄增入

按孔志文學類雷志學業類卽今志文苑類查孔志文學
載歐陽機王化大王化美王化良王元功滕化龍等名雷
志學業載周坤項惟慎劉蘊璧汪永清周培徐天佑柳應
祥李一鳳黃應元周正楊偉仁鄭國棟李蒞余又八鄭四
十孔衍任李重珍方人傑王大涵洪廷元鄭士麟蔣顯揚
毛漣王應魁姜朝聘等名申志並軼今補之